

三长物斋丛书

古誌石華卷二十八

三長物齋叢書

宋二

韓宗道

宋故通議大夫充寶文閣待制上柱國南陽郡開國侯
食邑一千三百戶致仕韓公墓誌銘

并序

朝奉大夫

充集賢殿修撰知泰州軍州兼管內勸農事上輕車都
尉曾鞏撰 朝請郎試中書舍人兼侍講上輕車都尉
賜紫金魚袋趙挺之書 左朝議大夫寶文閣待制知
潁昌軍府事兼管內勸農使京西北路安撫使吳安持
篆蓋 太中大夫寶文閣待制知杭州兩浙西路兵馬

鈐轄上柱國南陽郡開國侯食邑一千三百戶韓公諱
宗道字持正年七十有一上書謝事優詔許之遷通議
大夫命未至公卒於位三子曰璩曰瓌河南府軍巡判
官曰珙承務郎皆前死一孫曷郊社齋郎其弟朝散郎
宗直請於朝往護公喪既而枉道過予爲公請銘予與
公同時爲郎尙書已而偕爲從官既故且戚銘其可辭
韓氏世家常山自累贈太師開府儀同三司異國忠憲
公諱億以文學起家致位政府始葬其父累贈太師開
府儀同三司陳國公諱保樞于潁昌府之長社縣遂爲
潁昌人忠憲公八子二爲宰相一爲門下侍郎一知制

誥知制誥者諱綜累贈太尉公考也世德淵源其來有
自至公三世而盛大光顯實幾百年其間魁壘傑出爲
一時之望者相繼有人至於孝謹恂恂行稱於家材見
於事者亦多可紀公其一也公孝友慈祥自少無子弟
之過事諸父盡子職不獨於親然也其遇人豁然不立
畦畛其爲吏廉平無私所至勤勞公家不簡細故雖貴
且老未嘗怠以止也其爲近侍中立不倚不事夸奪雖
有忤心者莫之忌亦莫得而侮也故在家爲賢子在官
爲能吏而在朝廷爲良士孔子稱詩之夙夜匪懈又曰
無忝爾所生以爲大夫士之孝若公可以當之矣初公

以忠憲公恩補將作監主簿三遷大理評事監潁州商
稅務會汝陰闕縣令號多職田前攝事者得所入而州
俾公代公辭不得則過職田期而後往代時公年尙少
眾伏其廉嘉祐四年鎖其廳中進士第知越州餘姚縣
公仕潁已有能聲至是摘姦字良治行益白歷監在京
皮角庫簽書彰德軍節度判官事歲饑請發官粟貸貧
民民賴以濟熙寧初知巴州時天子進用二三大臣鼎
新政事公以名家子有聞於時近侍多薦公宜在臺閣
大臣亦雅知公會公叔康國公去相位卽擢公城都府
路轉運判官兼管勾常平農田水利差役事講議法制

必究利病因革損益視理如何不務紛更不膠舊貫繇
是一時同事者初雖異意卒皆絀已從公復其平正而
凡有改爲蜀人不知其擾入爲開封府判官復出提點
河北西路刑獄徙淮南路轉運副使兼提舉常平市易
事入遷尙書工部郎中時市易法初行任事者希功旁
緣漁奪公數裁之不聽則致之于理朝廷聞之遣官行
視任事者得罪去公亦徙知廬州盖公當官不撓其守
類如此歷知鳳翔府潞州官制行名爲尙書戶部郎中
太府卿元祐三年擢權戶部侍郎均節食貨號爲稱職
真拜刑部侍郎未幾復爲戶部以寶文閣待制權知開

封府聽決平恕不事苛察守中循理不苟虛譽歲餘復
還戶部五遷太中大夫紹聖初除寶文閣直學士知成
都府以喪子辭求便郡迺以待制知陳州徙青州兼京
東東路安撫使又徙瀛州兼高陽路安撫使又徙杭州
卒時紹聖四年七月甲子也元符二年七月十四日葬
長社縣嘉禾鄉耐忠憲公兆公在朝數言事嘗請擇守
令明黜陟以覈能不立嫁娶喪祭之制使貧富各安其
分詔有司節浮費興遺利量入爲出以制國用它所建
白類如此有文集二十卷藏於家母劉氏追封韓國太
夫人妻聶氏追封許昌郡君一女適祠部員外郎宋景

年孫女三人長適西京伊陽縣主簿宋晟餘尙處銘曰
有倬韓宗肇自龔公子孫馮厚益熾而崇有公有孤
曰仲叔季亦有持橐從容諷議猗與南陽克紹厥世豈
惟勢榮德亦是似崛起于少吟哦六經出偕寒儔擢第
王庭迺使四方明國若否迺將八州宜民父母地官之
亞天府之長在人無非在已無枉既果於退亦全其歸
命書在道歿有光輝潁川之郊其原膺膺以無忤往
從父祖

宗道爲韓億次子綜之子附見宋史及東都事略綜
傳不及此誌之詳此誌及前宗厚誌皆在許州東北

三十里前誌云嘉禾鄉靈井里先塋之次此云嘉禾鄉祔忠憲公兆蓋皆祔億而葬也誤者曾肇書者趙挺之篆者吳安持宋史皆有傳肇字子開南豐人鞏弟挺之字正夫諸城人安持附見吳充傳充之次子也誌云嘉祐四年鑱其廳中進士第宋制凡見任官應進士舉謂之鑱廳所屬官司先以名聞得旨而後解宗道以大理評事及第故曰鑱其廳也

楚通叔妾朱氏

朱故夫人朱氏墓誌銘

并序

承議郎致仕雲騎尉賜

緋魚袋李燾撰

奉議郎武騎尉賜緋魚袋趙欽明書

弁篆蓋 夫人姓朱氏河南緱氏人自幼歸故達州司
戶叅軍楚公諱□中字通尉通尉娶孫氏夫人事之勤
而盡禮孫夫人卧疾彌年夫人夙夜供侍藥餌略無倦
色逮孫夫人卒夫人□□□事司戶公尤謹恪閨門雍
肅內外歡心司戶公恬不求仕仁以愛物好施與調急
難賓客親舊至者不問識與不識待之均禮故食客無
虛日夫人周旋應辦無乏事生二男三女長日照任河
陽節度推官謹厚詳審季父正議待制公諱建中奏請
于朝以為其後宜解官持服以襄大事次日庶任信陽
軍錄事叅軍先夫人一月而亡長女適陝州陝縣令王

綝早世次適瀛州監押東頭供奉官張恂次適汝州魯
山縣令文□孫男三人長曰興義郊社齋郎次曰興民
次與女孫六人並幼夫人賦性寬厚處已儉約喜怒不
形於色語笑不妄為發司戶公捐館是時庶尚幼賴其
兄教育成人後至入官與兄皆在仕路夫人因迎侍之
官日屏家事唯誦佛書究其理而已庶任信陽錄叅到
官半載因疾而卒訃至照即遣男假承務郎興國迎夫
人泊孤幼旅櫬北歸次潁陽故里夫人遽感河魚之疾
照亟謁告□歸侍疾未幾卒于居第寔崇寧二年八月
二十八日也享年八十有一卜以當年十月二十七日

葬于河南府河南縣尹樊田萬安山之陽司戶公塋之
右丐銘于予予素荷司戶公之□舊義為其銘曰 勤
勞其初享福攸厚優游榮養八十其壽安之幽堂慶流
不朽 玉冊官□□刊

誌在洛陽縣行書

孫觀

宋故贈朝散郎孫公墓誌銘 朝奉郎行秘書省校書

郎兼國史編修官編修六典檢閱文字賜緋魚袋許翰
撰并書 承議郎祕書省著作郎編修六典檢閱文字
李敦義篆蓋 政和三年余入授中祕書所与並游往

往鮮明辯麗英發可喜而魯國孫君聖求獨靖固淵塞
渾然難知余心異之曰此豈非曲阜闕里之風也哉吾
今乃知天以夫子之教興於魯者因其質厚如此而文
生之也後二年謁其丈人大夫公於東郭私第聽其議
論重德人也又一年其家卜葬其先大父則狀其行与
事而請銘於余、既得交於聖求父子閒又得於此考
觀其世德之經緯本末喟然歎其積之遠矣因益見魯
多君子足以發吾昔日之言為不妄也遂書其躅而銘
以亂之君諱覲字明之泗水人曾祖諱程祖諱榮
考諱達世、以農服田至君之考乃盡割膏腴以與兄

弟而自取礪薄力耕其中君少而孤食麓攻苦事繼母
撫諸弟以立家母為敕戒所生無得恃吾故亂兄治官
府有政與勤其弟吾寧以身往役發於誠心以故上下
依懷閨門大和歲惡人爭貸粟於官君獨不往曰今自
刻厲尚可以生貸而不能歸是欺國也其居鄉能以義
槩動人沉毅慨慷時有俠氣有惡少自以負君妄意君
心結客數十撫刃從君、正衣冠而叱之惡少心震氣
褊失刃墮地數以云、不覺膝屈請得改事君因與講
不復帶芥巨寇將至鄉人大擾謀徙避之君心之曰少
俟我即持牛酒造寇壁願見因留與之醉飽歌呼相樂

輸以其情冠壯而義之為引去有故家子嗜酒不羈君
見戒以無頽家聲發怒辱君、謝遇之益厚其人愧之
終身避君縣吏與君不相能薦數中以吏事後敗困窮
君反覘之吏愧亡匿曰無面目見孫君矣蓋其能詘服
人心如此大夫罷官興元聞魯大荒或欲擇居它鄉君
不可曰無年如此族姻日夜望吾至以薦其饑吾何忍
擇利自營而不此顧卹乎旣歸弛擔即內外干指仰食
君、市米官廩雜糠覈藜藿相與食之無難色有餘則
以餉隣里之窮無告者振施甚衆大夫官蜀計司取錢
引之當毀官者復出之郡縣大夫月受以爲俸君曰以

此與民爲市是罔民也禁家人無得出積爲錢五六十萬盡廢其後有司建治操空文以市於民者官吏皆汙而大夫獨瞬無有蜀人賢之大夫之爲循吏君蓋多有力焉其自蜀歸則盡舉族人之無後與貧不克葬者凡三十五喪葬之未疾數月忽戒其子儉葬與凡家事豫爲條理大觀四年八月辛卯卒於舒州官舍年八十一以其子恩爲通直郎累贈至朝散郎其治命曰必於先塋乎吾葬今以十月甲申葬薨裘東節義鄉里仁之原與考同城娶曹氏贈太宜人男女二人男琪朝散大夫提點南康軍逍遙觀女適邑人潘潛孫凡四人傳儉億

儔傳奉議郎以辭學兼茂高選為祕書省正字即余之所異同舍郎也億將仕郎鄆州刑曹掾餘未官初君未嘗伏術為學而行事每與書合又能縛紬自下以延致士教其子孫詩書以故子孫彬、多以文行著云銘曰
暴興非祥墮神姦慶積離久乃見端根蟠源決天所
艱擢為脩林舒長瀾孫氏世隱耕寬閒逮君負能不施
官人文不琢天守完俟天我昌匪力干裔胄衮、方彈
冠謂君未顯非今患昭詩佳城唯後觀 裴通苗成魏
通模刻

誌在泰安縣婁德鎮萬壽宮東壁